

primùm de alimentis & medicamentis, eorumque facultatibus ac differentiis in genere agit, deinde insigniorum stirpium vires ex Galeni libris de simplicibus eodem ordine alphabeti Græci recenset, vt nos obseruauimus.

Auicenna librum secundum sui operis de medicamentis simplicibus omnis generis conscripsit, omnibus in vnum literarum ordinem redactis, in quo authores citat, Galenum, Dioscoridem, & quosdam paucos Arabes. Idem in libro de corde, simplicia medicamenta (vt vocant) cordialia, serie literarum enumerat.

Abenbitar (vel, vt scribunt alij, Ebenbitar) scripsit de simplicibus medicamentis opus insigne & magnum, ordine alphabetico, citatis authoribus, quod à Bellunensi aliquoties citatur, qui & Arabicum expositorem eum alicubi nominat. Hoc nuper ex peregrinatione sua in Orientem doctissimus vir Guil. Postellus secum aduexit. In eo (inquit in epistola quam de suis ac peregrinis & secum aduectis libris nuper ad me scripsit) simplicia quàm plurima & remedia innumera, quorum nec nomen, nec virtus, nec vsus, nobis adhuc innotuit, sunt expressa : atque omnia ita absolute, vt quicquid super iisdem medicamentis apud Dioscoridem, Galenum & Oribasium imperfectum & mutilatum est, ex hoc volumine restitui & sarciri possit. Idem & alia multa de medicamentis simplicibus volumina, innominatis authoribus, & Dioscoridis compen-